

REGIONAL NEWS BULLETIN

HEADLINES (EVENING)

Date – 30/05/2024

Time - 18:30 -18:40Hrs

- Aibawk a leiminin a chhilh nupa te zawnpui turin vawiin chawhnu khan Rapid Response Team in Aibawk an thleng.
- Cyclone Remal a kiam a, Mizoramah furpui a intan thung a, ni 2 lo awm tur chhungin ruah a sur nasat rin a ni.
- Lok Sabha inthlan thawsarihna leh a tawp ber tur atana campaign theih hun chu vawiin tlai khan a tawp.
- Khawlum lutuk avangin Delhi fire deparment chuan nimin khan tum 220 zet kangmei avanga tanpui tura kohna an dawng.

<><><>

CYCLONE

Aibawk leh Tachhip inkar Salem Venga leimin in a chhilh Pu Matthew Lalchhanhima leh a nupui Pi Vanlalruali te chu leimin atanga a ni 3-ni vawiin thleng khan hmuh an la ni lova,

Aibawk hi Aizawl atangin tlawh pawh theih mai anih loh avangin vawiin chawhnu lam khan Rapid Response Team an thleng chauh a, mi 16 awmna Rapid Response Team hian motor kal theihna chin Muallunghu atangin ke in Aibawk hi an thleng a ni.

Aibawk khawtlang hruatute sawi danin, an khaw thenawm ten pui ve mase, helai phei khua zawng zawngin leimin avangin harsatna nasa takin an tawk a, heti chung hian chhanchhuah hna

an thawhpui thei a, ruang zawn hna pawh chhunzawm zel an tum a ni.

Cyclone Remal si perin a ken tel ruahsur nasa vanga leiminin chenna in a hnawl vanga nunna chante zinga ruang pakhat chu vawiin khan hmuh belh a ni a.

Ruang zawng hian mi tlawmngaite leh Central YMA-in hnatlang tura a ruat YMA Branch thahnem tak vawiinah an thawk chhuak a. Hlimen leiminin chenna in a hnawl vanga nunna chan ruang pakhat chu vawiin chawhma khan hmuh a ni a; heti hian Hlimen bika leiminin a hnawl ruang te chu hmuh kim a ni ta a. Hlimen leiminah hian Mizo pahnih leh hnam dang paliin nunna an chan a ni.

Hetih lai hian Aibawka ruang la hmuh loh pahnih leh Melthuma ruang pali-te chu ngawrh taka zawn zui zel a ni a, chanchin buatsaih lai hian hmuh an la ni lo.

Disaster Management & Rehabilitation (DM&R) Department chhin chhiah dan chuan tun hnaia ruahsur leh thli tleh vang khan Mizoram chhunga khaw 167-ah chhiatna a thleng a. Chhiatna hi Aizawl District-a hmun 59, Lunglei District-a hmun 30, Siaha District-ah hmun 9, Champhai District-ah hmun 12, Kolasib District-ah hmun 8, Serchhip District-ah hmun 11, Lawngtlai District-ah hmun 8, Mamit District-ah hmun 11, Saitual District-ah hmun 10, Khawzawl District-ah hmun 5 leh Hnahthial District-ah hmun 4-ah te a thleng a ni.

<><><>

PHE – AIZAWL & SAITUAL WATER PUMP DISRUPTED

Aizawl khawpui chhung tui lakna ber Tlawng lui sawngbawlna khawl hrang hrang te tuilianin a tihchhiat chu engtik hunah nge siamthat a nih dawn hriat a la ni lo.

Public Health Engineering Dept. (PHED) Superintending Engineer (SE) Pu Lalrinzuala Ralte chuan Aizawl leh a chhehvel-a tui pump chhuahnaah harsatna nasa tak a thlen thu sawiin,

ruahsur hian Tlawng tui lakna Pump House chima khawl engemawzat a tihchhiat avangin Aizawl khaw chhungah tui pump theih a ni rih lo tih a sawi.

Pu Lalrinzuala Ralte chuan tuilianin a tihchhiat nasat ber, Greater Aizawl Water Supple Scheme – Phase I chu tuilianin khawl a chim khah vek avangin tui pump chhuah theih a ni rih lova, Phase II power supply line pawh tuilianin a tihchhiat avangin tui pump chhuah theih a ni lo, a ti a. Tunah hian Phase II Generating set hmangin tui pump chhuah tum mek a nih thu sawiin, mamawh zual – hospital leh emergency a hman tur phuhruk thei tur chauh a nih avangin Aizawl khawchhungah ni 1-a tui pump theih zat 39 mld chu engtikah nge pump chhuah theih a nih dawn hriat theih a nih rih loh avangin mipuite chu tui ren tur leh ruahrtui khawl turin a chah a ni.

Hetihlai hian Saitual leh a chheh vel chawmtu Tuivawl tui lian chuan Tuivawl PHE Pump house-a tui lak pennah chirh dum tam tak a chhek avangin tui pump theih a ni rih lo a.

PHED-in Generator lian an dahna zawl chu Tuivawl lian hian a chim avangin power supply lamah harsatna a tirah chuan a thlen a, siam anih hnuah tui lak luhna hmunah chirh nasa taka a luh avangin tui hi pump theih a ni ta lova, nimin khan a then fai hna zing kar atanga thawh ni mah se then fai zawk sen a ni lova. Chirh dum thian fai tur pawhin tui chim chin a la san avangin duh anga chet a la harsat thu PHED hotute chuan an sawi a, vawiin hian chirhdum thenfai hna an thawk chhunzawm leh a ni.

Kum danga Tuivawl tui pump a harsat changa innghahna, tlangram tui lakna chu hmun thenkhatah leiminin a tihchhiat avangin tun dinhmunah rin theih a ni lova, thawktuten line chhia hi theihtawp chhuaha siamthat hna an thawh mek thu PHED hotute chuan an sawi.

PHED hotute chuan mipuite tui ren a, fur ruahrtui a remchan anga dawh khawl hram hram tur leh chiiai lo turin an ngen a ni.

<><><>

ZMC

Cyclone Remal thli tleh leh ruahsur avangin Falkawna Zoram Medical College (ZMC) chu ni 3 chhung vel dan pinin a awm a, vawiin atang khan thawktu te pawh an inthlak leh thei tan chauh a ni.

ZMC leh a chhehvel hmun 30 chuang ah leimin in kawng a hnawh a, hospital bikah harsatna hrang hrang a thlen thu Zoram Medical College Director Dr. John Zohmingthanga chuan a sawi.

Ni 3 chhung hian ZMC campus leh a chhehvel ah power supply a chhiat bakah tui pipe tam tak leimin in a tichhiat avangin a damdawiin leh quarter zawng zawng kaltlang theih a ni lo va, Girls Hostel hnuai leivung ruahsur in a hawrh avangin zirlai 69 te chu hmun him zawkah sawn an ni.

Cyclone Remal vang hian hospital bikah harsatna power leh tui lamah te tawk mahse, damlo enkawl lai mek leh ICU awm mekte zingah nunna chan an awmlo a, tun dinhmun ah OPD kalpui theih a ni lova emergency erawh kalpui a ni a ti.

<><><>

MONSOON STARTS

Cyclone Remal a kiam a, Mizoramah furpui a intan thung a, ni 2 lo awm tur chhungan ruah a sur nasat rin a ni.

Aizawl Meterological Dept Director Sudheer Kumar Dwivedi-an a sawi danin, furpui a intan avang hian, ruah a sur nasat theih bakah, thli pawh a tleh ngei dawn a, hei vang hian mipuite an fimkhur chhoh a ngai dawn a ni.

Vawiin leh naktukah chuan a sur nasa lehzual thei a, leimin thei lakah te leh chhum zing nasa avanga chetsual theihna lakah te inven fimkhur a tul a, Mahni in leh lo en fel a ngaih bakah current khaihlak avanga harsatna awm thei lakah te inralrin a tul dawn a ni.

<><><>

LADC

Lai Autonomous District Council (LADC)-a Chief Executive Member (CEM) Pu C. Lalmuanthanga'n Executive Member atana a ruat mi pakua, Governor-in tunkar Thawhtannia a pawmpuite chu vawiin khan Lawngtlaia LADC Hall-ah Lawngtlai DC, Chemala Siva Gopal Reddy-a'n rinawmna thu tiamtirin LADC Executive Member atan a la lut a; lak luh hnu hian CEM hian Executive Member te hna chanpual tur tur a puang nghal.

Pu K. Lalthanzara Executive Secretary, LADC kaihhruai Executive Member te lakluhnaah hian Lawngtlai DC chuan MDC pakua - Lungtian bialtu Pu Sanghuliana Mualchin; Vathuampui bialtu Pu C. Rongura; Sekulh bialtu Pu Lallawmsanga Apetow; Bazar Veng Lawngtlai bialtu Pu Lalropuia Chinzah; Chawngte 'P' bialtu Pu Andrew Laltlanzara; Bualpui East bialtu Pu L. Daniala; Sangau South bialtu Pu JB Vanhoy; College Veng Lawngtlai bialtu Pu C. Hrangthianga leh Diltlang South bialtu Pu HC Lalthawmliana te rinawmna thu tiamtirin a la lut a ni.

CEM Pu C. Lalmuanthanga chuan zela hna an thawk thei tur chu lawmawm a tih thu sawiin, langtlang sorkar, mipui ban phak, thu nei fal bik awm lo, rualkhai taka ram tana hnathawh chu an tum ber a ni, a ti.

CEM hian amah leh Executive Member pakuate enkawl tur Department te a puang nghal a, vawiin vek khan Executive Member te hian an room luah nghalin Pathian hnena lawmthu sawina leh inhlan tharna an nei nghal a ni.

(Lalngheta Ralte Lawngtlai PTC)

<><><>

LOK SABHA

Lok Sabha inthlan thawsarihna leh a tawp ber tur atana campaign theih hun chu vawiin tlai khan a tawp a. Inthlan thawhsarihnaah hian Parliament Constituency 57 ah June ni 1 ah vote thlak tur a ni a. State leh Union Territory pasarihah inthlan a ni dawn a, Uttar Pradesh leh Punjab ah seat 13 ve ve, West Bengal ah seat 9, Bihar ah seat 8, Odisha ah seat 6, Himachal Pradesh ah 4, Jharkhand ah 3 leh Chandigarh ah pakhat a ni a. Inthlan thawhsarihnaah hian candidate 904 an awm dawn a ni.

Inthlan thawhsarihna rual hian Odisha-a Assembly bial 42 ah vote thlak a ni bawk ang.

Vawiin Campaign tawp niah Political Party hrugaiten campaign hmawrbawk nan theihtawp an chhuah a. Prime Minister leh BJP hrugaitu senior Narendra Modia chuan Punjab-a Hoshiarpur ah thusawiin Congress leh an thawhpui INDIA pawl chu mi tlawn lungawi leh vote-bank politics khelah a puh a ni. BJP President JP Nadda pawhin vawiin khan Amritsar, Faridkot, leh Roopnagar ah te thun a hmang a. AAP hrugaitu leh Punjab Chief Minister Bhagwant Singh Mann pawhin district hrang hrangah thu a sawi a ni.

Uttar Pradesh ah chuan Defence Minister leh BJP hrugaitu Rajnath Singh an Kushinagar, Robertsganj, leh Chandauli constituencies ah te thu a sawi a. Madhya Pradesh Chief Minister Mohan Yadava'n Kushinagar leh Sonbhadra ah kawng zawh a huaihawt bawk.

Bihar ah chuan RJD hotupa Lalu Prasad chuan Pataliputra ah kawngzawh leh voter outreach programme a nei a. RJD hrugaitu Tejashwi Prasad Yadav pawhin vawiin khan Parliament bial 8 ah thu a sawi a ni. Hei bakah hian Congress hrugaitu Rahul Gandhi chuan Simulia Balasore Lok Sabha constituency ah thu a sawi a. BJD sawrkar leh BJP beiin a ruka insuihfin an ni a ti a. Rahul Gandhi chuan BJP a beihna avangin alakah thubuai 24 ziahluh a ni a ti bawk.



DELHI FIRE

Khawlum lutuk avangin Delhi fire deparment chuan nimin khan tum 220 zet kangmei avanga tanpui tura kohna an dawng a, hei hi nikhata ala tam ber tum a ni. Heng kangmei chhuakte zingah bawlhhlawh paihna hmunte, Air Conditions kangte, Electric Meter leh hrui kangte an tel a. Delhi Fire Department Director Atul Garg chuan kuminah hian kangmei chhuak avanga rawn be tu hi zaa 25 in an pung a ti a. Kuminah khawlum nasa tak thleng thei tura sawilawk anih atangin kangmei liantham thleng lo turin theihtawpin an inpuahchah tih a sawi a. Mipuite pawh fimkhur a, an thurawn te zawm turin a chah a ni.

<><><>